

**Uunga siunnersuut: Qaffasinnerusumik ilinniartitaanerit pillugit Inatsisartut inatsisaata allanngortinneqarnera pillugu Inatsisartut inatsisaat**  
(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

**Saqqummiussissut**

**Siullermeerneqarnera**

Qaffasinnermik ilinniarfiit pillugit Inatsisartut inatsisaata allanngortinneqarnissaanik Inatsisartut inatsisissaattut siunnersuut matumuuna Naalakkersuisut sinnerlugit saqqummiuppara.

Matuminnga siunnersuuteqarnermi eqqumiitsuliornermik qaffasinnerusumik ilinniakkamut tunngatillugu ilinnialernissamut piunasaqaatinik, Qaffasinnerusumik ilinniartitaanerit pillugit Inatsisartut inatsisaanni nr. 14, 12. juni 2019-imeersumi aalajangersarneqartunik sanequtsisoqarsinnaanissaanik pisariaqartitsisoqalersimanera tunuliaqutaavoq.

Nunatta Isiginnaartitsisarfiata Isiginnaartitsinermik Ilinniarfiup inuussutissarsiornermik ilinniarfimmiit bacheloritut ilinniarfinngorlugu allanngortinneqarnissaa pillugu Ilinniartitaanermut, Kultureqarnermut Ilageeqarnermullu Naalakkersuisoqarfimmut 2020-mi ukiakkut inassuteqarneratigut pisariaqartitsineq ersepoq. Tassunga atatillugu ilinniarfimmu ilinniartunik akuersisarnermut atatillugu akuerisaanissamut misilitsittarnerit ingerlatiinnarneqarnissaat kissaatigineqartoq Nunatta Isiginnaartitsisarfiarit nalunaarutigineqarpoq.

QI-inatsimmi aalajangersarneqarpoq bacheloritut ilinniarfinnut akuerineqarnissamut ilinniarnertuunngorniarmik, tassunga ilanngullugu ilinniarnertuunngorniarnermi immikkut aaqqissuussami angusisimanissaq, piunasaqaatinik immikkut ittunik kiisalu karakteritigut piunasaqaataajunnartunik naammassinnissimanissaq piunasaqaataassasut. Ilinnialernissamut akuerineqarniaraanni aamma piunasaqaataassaaq qinnuteqartup misilitsinnermini angusisimanissaa ilinniarfiit pillugit malittarisassat aalajangerneqarsimasut naapertorlugit. Taamaalilluni qinnuteqartup ilinniarnertuunngorniarmik, tassunga ilanngullugu ilinniarnertuunngorniarnermik immikkut aaqqissuussamik naammassinnissimanissaa aalajangersakkami ilaavoq. Tamanna ilinnialernissamut misilitsinnermik ilaneqarsinnaajumaarpoq, taamaattorli soorlu akuerineqarnissamut misilitsinnerit isiginnaartitsisartuunngorniarmik atorineqartartut taakkunanga taarserneqarsinnaanngillat.

Ilinnialernissamut piunasaqaatit saneqqunneqarsinnaanerat pillugu QI-inatsimmi aalajangersakkanik aalajangersagaqanngilaq.

Taamaattumik eqqumiitsuliormik qaffasinnerusumik ilinniarfimmi, matumani isiginnaartitsisunngorniarfimmi ilinnialernissamut piumasagaatinik saneqqutsisinnaanissamut inatsisitigut tunngavissiinissaq siunnersuummi pingaarnertut siunertaavoq.

Tamatuma saniatigut ilinniarnermi pissuserissaarnissamillu malittarisassanik aalajangersaanissamut tunngavissanik erseqqissaasoqarnissaanik pisariaqartitsineq ersersimavoq.

Taamatuttaaq Naalackersuisut nakkutilliinissamut pisinnaatitaaffiata erseqqissarnissaa tulluarsorineqarsimavoq taamalu ilinniarfik, ilinniakkamut qinnuteqartut sulisullu pillugit paasissutissat pisariallit tamaasa ilinniarfeqarfinit, qaffasinnerusumik ilinniakkanik neqerooruteqartunit piniarsinnaavaat, taamatuttaarlu nakkutilliinissaq kisitsisitigullu paasissutissanik suliaqarnissaq siunertaralugit ilinniarfeqarfinnut alakkarsinnaanissaannut matumunngalu malittarisassanik aalajangersaasinnaanissaannut tunngavimmik erseqqissumik ilanngussisoqarluni.

Naalackersuisut immikkut ittumik pisoqartillugu, misileraalluni sulinerup perorsaallunilu inerisaanissap siuarsarnissaannik pissuteqartumik QI-inatsimmik saneqqutsisinnaanissaannik periarfissiisunik aalajangersaasoqarnissaa aamma kissaatigineqarsimavoq. Naalackersuisut tamatuma saniatigut ilinniartunut ataasiakkaanut tunngatillugu immikkorluinnaq ittunik pissutissaqartillugu, inatsimmik saneqqutsisinnaanerat pillugu aalajangersagaqarpoq.

Taamatut oqaaseqarlunga siunnersuut Inatsisartuni suliarineqartussanngorlugu ingerlateqqippara.